

CYNGOR SIR

Cofnodion cyfarfod o'r Cyngor Sir a gynhaliwyd yn Council Chamber, County Hall, Ruthin LL15 1YN, Dydd Mawrth, 27 Mawrth 2012 am 10.00 am.

YN BRESENNOL

Y Cyngorwyr Ian Armstrong, Raymond Bartley, John Bellis, June Cahill, Jeanette Chamberlain-Jones, William Cowie, Ann Davies, James Davies, Meirick Davies, Pauline Dobb, Michael Eckersley, Christine Evans, Gwilym Evans, Bobby Feeley, Sharon Frobisher, Ian Gunning, Diana Hannam, Colin Hughes, Huw Jones, Morfudd Jones, Richard Jones, Gwyneth Kensler, Paul Marfleet, Lucy Morris, Peter Owen, Dewi Owens, Allan Pennington, David Thomas, Selwyn Thomas, Julian Thompson-Hill, Cefyn Williams, Eryl Williams a Jane Yorke

HEFYD YN BRESENNOL

Prif Weithredwr (MM); Cyfarwyddwyr Corfforedig: Dysgu a Chymunedau (HW) and Demograffeg, Lles a Chynllunio (SE); Pennaeth Gwasanaethau Cyfreithiol a Democrataidd a Swyddog Monitro (RGW); Pennaeth Cyllid ac Asedau (PM); Dirprwy Swyddog Monitro / Cyfreithiwr (LJ), a Gweinyddwr Pwyllgorau (KEJ)

CYHOEDDIADAU

Bu'r Cadeirydd yn llongyfarch –

- Rheolwr Ymgysylltu ac Ymgynghori'r Cyngor am gael Gradd Meistr gyda rhagoriaeth mewn Gweinyddu Busnes
- Adran Dysgu Gydol Oes y Cyngor am yr Adroddiad Arolygiad Estyn diweddaraf am wasanaethau plant a phobl ifanc ac addysg y sir, a oedd yn disgrifio'r awdurdod fel un da gyda sgiliau arwain rhagorol, a bu'n talu teyrnged i ymroddiad a gwaith yr aelodau a'r swyddogion
- y pedwar ar hugain o ddisgyblion chweched dosbarth a oedd wedi ennill tridiau o ymweliad â Senedd Ewrop yn rhan o gystadleuaeth traethawd a drefnwyd gan Europe Direct Llangollen. Soniwyd yn arbennig am Alice Rowland o Ysgol Brynhyfryd a enillodd y safle cyntaf ac wythnos o brentisiaeth yn swyddfa Jill Evans, ASE i Gymru
- Llanelwy am gael statws Dinas yn rhan o ddatliadau Jiwbilî Diemwnt y Frenhines, a
- Chôr Ysgol Dinas Brân am ei berfformiad rhagorol yn canu yn rhan o ddatliadau Rygbi'r Chwe Gwlad.

1 YMDDIHEURIADAU

Y Cyngorwyr Brian Blakeley, Joan Butterfield, Hugh Evans, Neville Hughes, Rhiannon Hughes, Rhys Hughes, Glyn Jones, Barbara Smith a David Smith

2 DATGANIADAU BUDDIANT

Datganodd y Cynghorydd Ian Armstrong fuddiant personol ym mhrosiectau Harbwr y Foryd a oedd yn rhan o Gynllun Cyfalaf 2011/12 – 2014/15 yn eitem 8 ar yr agenda.

3 MATERION BRYN FEL Y CYTUNWYD ARNYNT GAN Y CADEIRYDD

Ni chodwyd unrhyw faterion bryn.

4 DYDDIADUR Y CADEIRYDD

Cyfeiriodd y Cadeirydd at yr ymrwymiadau dinesig a fodlonodd ar ran y Cyngor yn ystod y cyfnod rhwng 1 a 20 Mawrth 2012 (cylchredwyd y dyddiadur yn flaenorol).

PENDERFYNWYD nodi'r digwyddiadau a fynychwyd gan y Cadeirydd ym mis Mawrth 2012.

5 ADOLYGU'R CYFANSODDIAD

Cyflwynodd y Swyddog Monitro (SM) ei adroddiad gyda'r Dirprwy Swyddog Monitro/Cyfreithiwr (DSM/C) yn gofyn i'r aelodau gymeradwyo'r newidiadau arfaethedig yng nghyfansoddiad y Cyngor er mwyn moderneiddio'r fersiwn gyfredol a'i gwneud yn fwy tryloyw. Rhyddhawyd copi o'r cyfansoddiad wedi'i ddiwygio i'r aelodau ar wahân a oedd yn amlygu'r newidiadau arfaethedig er mwyn cyfeirio atynt yn hawdd. Ymddiheurodd y SM nad oedd y cyfansoddiad drafft ar gael tan yn ddiweddar, oherwydd anawsterau argraffu.

Atgoffwyd yr Aelodau eu bod wedi ystyried amlinelliad y gwelliannau arfaethedig yn eu cyfarfod Cyngor Sir diwethaf gyda'r bwriad o fabwysiadu'r drafft llawn yn y cyfarfod arbennig hwn. Cyfeiriwyd at y broses ymgynghori helaeth ag aelodau a swyddogion yn arwain at y drafft terfynol i'w gymeradwyo. Gofynnodd y SM i'r aelodau ystyried y gwelliannau arfaethedig fel y'u nodwyd yn yr adroddiad a bu yntau a'r DSM/C yn tywys yr aelodau drwy'r cyfansoddiad drafft ac yn ymhelaethu ar y meysydd hynny lle cynigiwyd newidiadau gan gynnwys y Cod Ymddygiad; Disgrifiadau Swydd Aelodau; Hyrwyddwyr; Cabinet; Cynllunio; Pwyllgor Safonau; Erthygl 12 – Swyddogion Statudol; Erthygl 13 – Gwneud Penderfyniadau; Llofnodi a Selio Dogfennau; Adolygiad Parhaus o'r Cyfansoddiad; Disgrifiad o Swyddogaethau; Cylch Gorchwyl Pwyllgorau; Craffu; Rheolau Gweithdrefn Contract; Gweithdrefnau Gwrandawriad Pwyllgor Safonau; Protocolau; Cynllun Dirprwyo i Swyddogion, a Rhyddid Gwybodaeth.

Roedd yr Aelodau'n croesawu'r adolygiad o'r Cyfansoddiad ac yn talu teyrnged i waith y swyddogion yn hynny o beth. Wrth ystyried y ddogfen drafft, amlygwyd nifer o wallau argraffyddol a materion fformadu ynghyd â nifer o anghysondebau yr oedd gofyn eu cywiro a bod angen rhestr o fyfodau. Wrth nodi'r pethau hynny, cynghorodd y SM y byddai'r drafft cyfan yn cael ei archwilio'n drwyadl cyn cael ei

gyhoeddi. Bu'r Aelodau hefyd yn ceisio eglurhad am nifer o bethau yr oeddent yn teimlo y dylid eu cynnwys yn y cyfansoddiad a chadarnhaodd y SM y cyfeiriwyd at y pethau hynny mewn gwahanol rannau o'r cyfansoddiad neu'r tu allan i'r cyfansoddiad fel sy'n briodol fel a ganlyn –

- roedd y rheolau cydbwysedd gwleidyddol a nifer y seddi ar y Cabinet wedi'u nodi yn y cyfansoddiad
- roedd y Cyngor yn cadw rhestr o swyddi sy'n wleidyddol gyfyngedig nad oedd angen eu cynnwys yn y cyfansoddiad
- roedd yr egwyddorion yng nghod ymddygiad yr aelodau yn cynnwys dangos parch ac ystyriaeth at eraill a byddai hefyd yn cynnwys teyrngarwch gwleidyddol
- cyfeiriwyd at rôl a chyfrifoldebau'r arweinydd yn y cyfansoddiad ynghyd â rhestr o ddirprwyaethau yn nodi pwerau'r arweinydd. Amlygwyd y mecanwaith i'r arweinydd ymdrin â materion brys ynghyd â'r dulliau diogelu sydd yn eu lle i alw i mewn penderfyniadau a wneir gan aelodau'r Cabinet
- nid oedd y cynllun lwfansau wedi'i adolygu ond byddai angen i'r Cyngor newydd ei ystyried ar ôl cael adroddiad y Panel Tâl am gyflogau'r dyfodol i'r aelodau
- gwnaethpwyd darpariaeth ar gyfer adroddiadau blynyddol a luniwyd gan aelodau ym Mesur Llywodraeth Leol (Cymru) 2011 a byddai'n cael ei hadlewyrchu yn y cyfansoddiad pan fyddai'n gyfraith
- roedd cyfrifoldebau am swyddogaethau dewis lleol wedi'u nodi gan ddisgrifio ble roedd y Cyngor wedi penderfynu'n flaenorol ar swyddogaethau arbennig i'w cyflawni gan y Cyngor neu'r Cabinet
- ni chodwyd dirprwy aelodau mewn cyfarfodydd fel mater i'w adolygu ond gellid ei ailystyried os dymunai'r Cyngor a byddai'n golygu ymgynghori ag aelodau a grwpiau
- roedd y rhestr o gynrychiolwyr ar gyfrif allanol yn cael ei hadolygu ar y pryd a gellid ei rhyddhau i aelodau ar ôl ei chwblhau; a
- rhoddwyd gwybod am y trefniadau cydbwysedd gwleidyddol newydd ar gyfer penodi Cadeiryddion Pwyllgorau Craffu o dan Fesur Llywodraeth Leol 2011.

Cytunodd y SM hefyd i holi'r Adran Gynllunio o ran ymgorffori unrhyw newidiadau yn y Protocol Cynllunio a fabwysiadwyd yn 2005 ac i ailystyried y ddeddfwriaeth a restrwyd yn yr ymgynghoriad yn ymdrin â dirprwyaethau i'r Pennaeth Cynllunio, Adfywio a Gwasanaethau Rheoleiddio i sicrhau ei bod wedi'i diweddarau.

Wrth ystyried y cyfansoddiad drafft, manteisiodd yr aelodau ar y cyfle i roi sylwadau a gofyn cwestiynau i'r SM a'r DSM/C. Roedd y pwyntiau trafod allweddol yn cynnwys –

- pwysigrwydd Hyrwyddwyr a'r angen am fwy o eglurder ynghylch eu rôl a'u cyfrifoldebau ac yn y broses benodi. Bu'r Cynghorydd Ian Gunning hefyd yn hyrwyddo Hyrwyddwr i bobl ifanc. Cytunwyd i ailystyried mater Hyrwyddwyr yn gynnar yn nhymor y Cyngor newydd
- nodwyd bod presenoldeb aelodau mewn cyfarfodydd yn fater allweddol a chytunwyd i sôn yn swydd ddisgrifiadau'r aelodau y byddai cofnodion presenoldeb yn cael eu cyhoeddi
- cyfeiriodd y Cynghorydd Gwyneth Kensler at yr hyfforddiant trwyddedu diweddar a cheisiodd sicrhau fod y materion a godwyd o ran swyddogaethau

- trwyddedu wedi cael sylw. Cadarnhaodd y DSM/C y gellid dirprwyo i'r Pwyllgor Trwyddedu faterion sy'n berthnasol i ddarparu dewis lleol
- mewn ymateb i bryderon a godwyd gan y Cynghorydd June Cahill, cyfeiriodd y SM at y broses statudol ar gyfer ceisiadau trwyddedu a chytunodd i ganfod a oedd unrhyw gyfle i ddiwygio'r gweithdrefnau er mwyn ymgysylltu ymhellach â buddgyfranogwyr a'u cynnwys yn fwy yn y broses
 - yr angen i gynnwys hyfforddiant gorfodol i'r Pwyllgor Trwyddedu yn unol â'r Pwyllgor Cynllunio oherwydd natur led-farnwrol y pwyllgorau hynny
 - yr angen i gynnwys hyfforddiant gorfodol i aelodau'r Pwyllgor Llywodraethu Corfforaethol am faterion ariannol o ystyried eu cyfrifoldebau am Reoli'r Trysorlys a Chyfrifon Blynnyddol
 - pwysigrwydd hyfforddi'r aelodau am Ddiogelu Data
 - dylai'r protocol ar gyfer cysylltu ag aelodau gynnwys mecanwaith er mwyn rhoi gwybod i'r aelodau lleol am ymatebion i faterion a godwyd gan gynghorau tref/cymuned yn eu hardal ac i sicrhau ymateb amserol i faterion a godir gan gynghorwyr sir
 - fod angen i'r cyfansoddiad fod ar gael a bod yn haws ei ddarllen ar-lein. Cadarnhaodd y SM fod gwaith yn parhau gyda TGCh yn hynny o beth
 - mewn ymateb i bryderon, bu'r DSM/C yn rhoi gwybod am y gofyniad i gyhoeddi penderfyniadau dirprwyedig a chytunodd i newid y geiriad yn y cyfansoddiad i sicrhau bod y gofyniad yn glir ac na allai'r swyddogion weithredu nes bod y broses wedi'i chwblhau. Cytunodd hefyd i godi mater hygyrchedd penderfyniadau a gyhoeddir gyda'r Gwasanaethau Democratig i fynd i'r afael ag unrhyw wendid, a
 - thrafodwyd y broses dendro a chadarnhaodd y DSM/C fod y Tîm Caffael yn archwilio posibilrwydd cynnwys buddion cymunedol yn rhan o fanylebau tendr a fyddai o fudd i'r economi leol.

Cydnabu'r Aelodau hefyd mor bwysig yw hyfforddiant Cod Ymddygiad a chytunasant y byddai hyfforddiant yn cael ei wneud yn orfodol unwaith ym mhob cyfnod swydd a byddai cyrsiau gloywi hefyd ar gael i'r aelodau ynghyd â'r cyfle i wneud e-ddysgu/dysgu o bell ar y pwnc. Codwyd hefyd fod angen gwneud darpariaeth ar gyfer hyfforddiant gorfodol yn gynnar yng ngweinyddiaeth newydd y Cyngor. Awgrymwyd hefyd y dylai aelodau sy'n torri'r Cod gael hyfforddiant pellach. Mewn ymateb i sylwadau'r aelodau, bu'r SM yn ymhelaethu ar y broses ar gyfer ymdrin ag achosion o dorri'r Cod ynghyd â rôl y Pwyllgor Safonau a'r cosbau a osodir. Cadarnhaodd fod hyfforddiant Cod Ymddygiad wedi'i drefnu'n gynnar yn rhaglen hyfforddi aelodau newydd ac y byddai hyfforddiant yn cael ei ddarparu hefyd i Gynghorau Tref a Chymuned yn yr ychydig fisoedd cyntaf, gan roi digonedd o gyfleoedd i aelodau fynychu, a bod cwrs gloywi wedi'i drefnu ar gyfer mis Hydref 2012. Byddai'r Pwyllgor Safonau'n monitro presenoldeb yn yr hyfforddiant Cod Ymddygiad.

Manteisiodd y SM ar y cyfle i ddiolch i'r aelodau am eu cyfraniad at y broses adolygu ac i'r DSM/C a'i gynorthwydd personol am eu gwaith caled yn llunio'r ddogfen.

PENDERFYNWYD bod y Cyngor -

- (a) yn cymeradwyo hyfforddiant gorfodol, unwaith ym mhob cyfnod swydd, i bob aelod ar y Cod Ymddygiad ynghyd â darparu hyfforddiant gloywi bob hyn a hyn, yn cymeradwyo'r terfyn o £25 i'r gofyniad i gofrestru rhoddion a chroeso, ac yn mabwysiadu'r Cod Ymddygiad diwygiedig i adlewyrchu'r gofynion hynny;
- (b) yn mabwysiadu'r Protocolau y cyfeirir atynt ym mharagraff 4.15 o'r adroddiad; ac
- (c) yn cymeradwyo'r newidiadau arfaethedig yn y Cyfansoddiad fel y'u nodwyd yn yr adroddiad ac fel y'u disgrifiwyd yn y Cyfansoddiad drafft.

6 ADOLYGIAD O'R GWASANAETH CRWNER

Cyflwynodd y Swyddog Monitro (SM) ei adroddiad yn gofyn i'r aelodau gymeradwyo dewisiadau mewn perthynas â darparu gwasanaeth Crwner a chymorth gweinyddu i awdurdodaethau Gogledd-ddwyrain Cymru a Chanolbarth Gogledd Cymru. Roedd crynodeb o fanteision ac anfanteision pob dewis (Atodiad 1) ynghyd â chymhariaeth o gostau'r pedwar dewis (Atodiad 2) ynghlwm wrth y prif adroddiad.

Cafodd yr Aelodau ychydig o wybodaeth gefndir i'r system crwneriaid a'r sefyllfa gyfredol yng Ngogledd Cymru, yn arbennig i'r awdurdodaethau crwneriaid a oedd yn destun yr adolygiad, Gogledd-ddwyrain Cymru (a weinyddir gan Gyngor Bwrdeistref Sirol Wrecsam) a Chanolbarth Gogledd Cymru (a weinyddir gan Gyngor Sir Ddinbych) o ran baich achosion, darparu'r gyllideb a chymorth gweinyddol. Bu'r SM yn ymhelaethu ar y pedwar prif ddewis a nodwyd o ran darparu gwasanaethau'r dyfodol fel a ganlyn –

Dewis 1 – Cynnal y trefniant cyfredol

Dewis 2 – Cadw dwy awdurdodaeth ond cyfuno trefniadau gweinyddol

Dewis 3 – Cyfuno'r ddwy awdurdodaeth a phenodi un Crwner amser llawn

Dewis 4 – Cyfuno'r ddwy awdurdodaeth a phenodi un Crwner rhan-amser

Roedd swyddogion o'r ddau Awdurdod Arwain cyfredol wedi argymhell Dewis 3 a hwn hefyd oedd hoff ddewis y Weinyddiaeth Gyfiawnder a Chymdeithas y Crwneriaid. Roedd Cyngor Bwrdeistref Sirol Conwy hefyd wedi cadarnhau ei fod yn derbyn y dewis hwnnw. Pe byddai Dewis 3 yn cael ei fabwysiadu, teimlwyd mai Sir Ddinbych a fyddai yn y sefyllfa orau i wneud gwaith yr Awdurdod Arwain o ystyried ei lleoliad canolog a'i gallu i reoli. Prif anfantaes Dewis 3 oedd posibilrwydd amser teithio cynyddol i deuluoedd ddod i gwestau os na fyddai ond un lleoliad llys yn cael ei ddefnyddio. Fodd bynnag, gellid goresgyn hynny drwy ofyn bod y crwner yn teithio i gynnal cwestau mewn gwahanol fannau.

Wrth ystyried yr adroddiad a'r dewisiadau, bu'r Cynghorydd Ian Gunning yn atseinio ymateb Heddlu Gogledd Cymru i'r ymgynghoriad gan gadarnhau bod Awdurdod yr Heddlu wedi mwynhau perthynas dda â'r crwneriaid am lawer blwyddyn a'i fod yn ceisio cynnal y berthynas gadarnhaol honno. Cyfeiriodd y Cynghorydd Paul Marfleet at e-bost a gafwyd gan rai aelodau'r noson flaenorol oddi wrth breswlydd yn Rhuthun a oedd wedi codi mater cyfieithu yn y gwasanaeth Crwner y gall fod angen ei ystyried ymhellach. Cyfeiriodd hefyd at ffi'r Cyfarwyddwr Angladdau am

gasglu cyrff. Bu'r Cynghorwyr Cefyn Williams ac Allan Pennington yn sôn am eu profiad personol eu hunain o'r gwasanaeth Crwner a chodwyd pryderon ynghylch tôn gohebiaeth arbennig i bobl mewn profedigaeth ddiweddar; y diffyg darpariaeth i gynnal cwestau drwy gyfrwng y Gymraeg a dogfennaeth Gymraeg, ynghyd â'r oedi yn y broses yn gwaethygu'r galar a deimlid gan deuluoedd. Roedd unrhyw ddatblygiad ar y materion hynny a gwelliannau yn y gwasanaeth Crwner o ganlyniad i'r adolygiad i'w croesawu. Bu'r SM yn rhoi gwybod am elfennau cyfreithiol cwblhau'r dystysgrif marwolaeth ac anawsterau dilynol yn llunio dogfennaeth ddwyieithog yn hynny o beth. Fodd bynnag, byddai darpariaeth Gymraeg mewn cwestau a llunio dogfennaeth Gymraeg gan y gwasanaeth Crwner yn cael eu hadolygu pe byddai'r cynnig yn mynd yn ei flaen. Ychwanegodd fod y ffioedd a dalir i Gyfarwyddwyr Angladdau gasglu cyrff hefyd yn destun adolygiad gyda Chyngor Bwrdeistref Sirol Wrecsam.

Yng ngoleuni'r pryderon a godwyd ynghylch darpariaeth Gymraeg yn y gwasanaeth, bu'r Cynghorydd Meirick Davies yn hyrwyddo bod y gallu i gyfathrebu drwy gyfrwng y Gymraeg yn cael ei wneud yn faen prawf hanfodol ar gyfer swydd y Crwner. Roedd y Cynghorydd Richard Jones yn cefnogi'r farn honno. Dywedodd y SM fod y Weinyddiaeth Gyfiawnder yn nodi gofynion ar gyfer y swydd a, phe byddai ymgeisydd di-Gymraeg yn cael ei benodi, byddai angen rhoi mesurau ar waith i sicrhau y gellid ymdrin â chwestau a gwaith papur drwy gyfrwng y Gymraeg. Wrth ystyried yr argymhellion, cynigiodd y Cynghorydd Meirick Davies gyfeirio'n benodol at Ddewis 3 yn 3.2 o'r argymhellion er eglurder. Ar ôl bwrw pleidlais –

PENDERFYNWYD –

- (a) *cyfuno awdurdodaethau cyfredol Gogledd-ddwyrain Cymru a Chanolbarth Gogledd Cymru i ymdrin â phedair ardal awdurdod lleol Conwy, Sir Ddinbych, Sir y Fflint a Wrecsam;*
- (b) *penodi Crwner amser llawn i ymdrin â'r awdurdodaethau cyfunol fel y disgrifiwyd yn Newis 3 a nodwyd yn yr adroddiad;*
- (c) *dynodi Cyngor Sir Ddinbych fel Awdurdod Arwain y Crwner ac i ddarparu swyddogaethau cymorth gweinyddol i'r gwasanaeth, a*
- (d) *dosrannu costau ar sail cymhareb poblogaeth.*

GWAHARDD Y WASG A'R CYHOEDD

PENDERFYNWYD o dan Adran 100A o Ddeddf Llywodraeth Leol 1972, gwahardd y Wasg a'r Cyhoedd o'r cyfarfod ar gyfer yr eitem fusnes ganlynol ar y sail y byddai'n debygol o ddatgelu gwybodaeth eithriedig fel y'i diffinnir ym Mharagraffau 14 o Ran 4 o Atodlen 12A o'r Ddeddf.

7 CYNLLUN CYFALAF 2011 / 12 - 2014 / 15

[Dygwyd yr eitem hon ymlaen ar yr agenda gyda chaniatâd y Cadeirydd]

Datganodd y Cynghorydd Ian Armstrong fuddiant personol ym mhrosiectau Harbwr y Foryd sydd wedi'u cynnwys yn yr eitem hon.

Cyflwynodd y Cynghorydd Julian Thompson Hill, Aelod Arwain dros Gyllid ac Effeithlonrwydd ei adroddiad cyfrinachol ar y cyd â'r Pennaeth Cyllid ac Asedau i roi gwybod y diweddaraf i'r Cyngor am elfen 2011/12 o'r Cynllun Cyfalaf ac i ofyn iddo gymeradwyo'r Cynllun Cyfalaf ar gyfer y cyfnod rhwng 2011/12 a 2014/15. Bu'r Aelod Arwain yn rhoi'r wybodaeth ddiweddaraf i'r aelodau am yr amrywiaeth gyfredol o brosiectau mawr a phrosiectau ychwanegol a gymeradwywyd gan y Tîm Gweithredol Corfforaethol a'r Cabinet ar 20 Chwefror a 20 Mawrth yn y drefn honno, derbyniadau cyfalaf a dangosyddion darbodus. Cadarnhaodd fod y Cyngor wedi aros y tu mewn i'w derfynau benthyca drwy'r amser.

Er ei fod yn croesawu'r prosiectau gwella i'r Rhyl, amlygodd y Cynghorydd Selwyn Thomas y problemau tagfeydd traffig i ymwelwyr â'r ardal a bod angen ffordd liniaru i fynd i'r afael â hwy. Roedd y Cynghorwyr Diana Hannam a Jeanette Chamberlain Jones yn cytuno â'r farn honno a phwysleisiasant fod angen mynd i'r afael â'r broblem ar frys i sicrhau na fyddai ymwelwyr yn cael eu hatal rhag ymweld â'r dref. Bu'r Cynghorydd Chamberlain Jones hefyd yn gofyn am sicrhau bod y mentrau fel prosiect Harbwr y Foryd wedi ystyried mynediad i'r anabl a bod y gwaith amddiffynfeydd rhag llifogydd yn gwella ardal y promenâd. Bu'r Cynghorydd Meirick Davies hefyd yn amlygu bod angen ffordd liniaru rhwng Llanelwy a Threfnant. O ran caffael eiddo ar y promenâd, cododd y Cynghorydd Davies bryderon am ddymchweliad tebygol yr adeilad ac amlygodd fod angen sicrhau bod ystyriaeth briodol yn cael ei rhoi i gadw'r eiddo o ystyried ei fod mewn ardal gadwraeth. Manteisiodd yr Aelodau ar y cyfle hefyd i godi cwestiynau am brosiectau unigol eraill a ddisgrifiwyd yn y Cynllun Cyfalaf ynghyd â goblygiadau cost a darpariaeth ar gyfer llithriad.

Mewn ymateb i gwestiynau/sylwadau'r aelodau, bu'r Aelod Arwain a'r Pennaeth Cyllid ac Asedau –

- yn cynghori bod unrhyw ofyniad am ffordd liniaru i'r Rhyl y tu hwnt i gylch gwaith yr adroddiad dan sylw
- yn cytuno i archwilio a oedd asesiad o risg llifogydd yn ofynnol ar ôl gwaith Amddiffynfeydd Arfordirol y Rhyl ac unrhyw gostau cysylltiedig
- yn cadarnhau y byddai prosiectau'n cael eu cwblhau gyda mesurau anabledd llawn yn eu lle mewn cydymffurfriad â'r Ddeddf Gwahaniaethu ar sail Anabledd
- yn ymhelaethu ar Gam 3 o waith Amddiffynfeydd Arfordirol y Rhyl a'r cynigion am waith amddiffyn rhag llifogydd a chostau cysylltiedig
- yn cadarnhau, petai prosiectau'n cael eu gohirio'r tu hwnt i'r flwyddyn ariannol gyfredol, y byddai'r cyllid a ddyrannwyd yn cael ei ddwyn drosodd i Gynllun Cyfalaf y flwyddyn nesaf a bod rhywfaint o gronfa wrth gefn wedi'i chynnwys yn barod
- yn rhoi'r wybodaeth ddiweddaraf i'r aelodau am debygolrwydd dymchwel eiddo ar Bromenâd y Rhyl ac ailddatblygu'r safle yn y dyfodol
- yn cytuno i roi manylion pellach ynghylch prosiect Canolfan Grefft Newydd Rhuthun

- yn cynghori bod y Tŵr Awyr yn aros ar gau gyda dewisiadau'r dyfodol yn cael eu harchwilio gan Dîm y Rhyl yn Symud Ymlaen
- yn rhoi gwybod y diweddaraf am sefyllfa ddiweddaraf y cynigion am lwybr beicio rhwng Rhuthun a Dinbych
- yn cynghori bod arian cyfatebol i Ysgolion yr 21ain Ganrif wedi'i gynnwys yn y Cynllun Cyfalaf a oedd yn annhebygol o gael ei wario yn 2012/13.

PENDERFYNWYD bod y Cyngor –

(a) yn nodi'r sefyllfa ddiweddaraf am elfen 2011/12 o'r Cynllun Cyfalaf a'r wybodaeth ddiweddaraf am brosiectau mawr, ac

(b) yn cymeradwyo'r Cynllun Cyfalaf fel y'i dangosir yn Atodiad 1 i'r adroddiad.

SESIWN AGORED

Ar ôl cwblhau'r uchod, ailddechreuodd y cyfarfod mewn sesiwn agored.

O'r man hwn, nid oedd cworwm gan y cyfarfod ac aeth rhagddo'n anffurfiol.

8 BLAENRAGLEN WAITH Y CYNGOR

Cyflwynodd y Pennaeth Gwasanaethau Cyfreithiol a Democratig Flaenraglen Waith y Cyngor gan gynghori y gallai cyfarfod y Cyngor a drefnwyd ar gyfer 17 Ebrill 2012 gael ei ganslo oherwydd diffyg busnes.

Mewn ymateb i gwestiwn oddi wrth y Cynghorydd Eryl Williams, dywedodd y Pennaeth Gwasanaethau Cyfreithiol a Democratig nad oedd yn gwybod a oedd cymorth wedi'i geisio gan Aelodau Cynulliad ynghylch darpariaeth tai yn y Cynllun Datblygu Lleol fel y gofynnwyd amdano yng nghyfarfod diwethaf y Cyngor Sir.

PENDERFYNWYD derbyn a nodi *Blaenraglen Waith y Cyngor*.

Daeth y cyfarfod i ben am 1.15 p.m.